

FRÁSÖGN

af septemberfundum Norðurlandaráðs í Tampere, 22.–23. september 2014

Septemberfundir Norðurlandaráðs voru haldnir í Tampere í Finnlandi dagana 22.–23. september sl. Af hálfu Íslandsdeildar Norðurlandaráðs tóku þátt í fundunum Höskuldur Þórhallsson, formaður, Elín Hirst, Helgi Hjörvar, Steingrímur J. Sigfússon og Valgerður Gunnarsdóttir, auk Lárusar Valgarðssonar ritara. Helstu mál á dagskrá voru samskipti Norðurlandaráðs við rússneska þingmenn, norrænir vefnaðarvöruframleiðendur í láglauNALöndum og réttindi barna í tengslum við 25 ára afmæli barnasáttmála Sameinuðu þjóðanna.

Forsætisnefnd fjallaði um samskipti og samstarf Norðurlandaráðs við rússneska þingmenn í kjölfar yfirlýsingar Norðurlandaráðs á vorþingfundi ráðsins í apríl sl. á Akureyri þar sem fram kom að innlimun Krímskaga í Rússland væri óásættanleg, sem og að árlegum hringborðsumræðum þingmanna Norðurlandaráðs með rússneskum þingmönnum, aðallega frá Ríkisdúmunni og Sambandsráðinu, sem halda átti í maí sl., var frestað. Forsætisnefnd ákvað að aflýsa hringborðsumræðunum en bjóða rússneskum þingmönnum til árlegs fundar með forsætisnefnd í tengslum við þing Norðurlandaráðs í október nk. í Stokkhólmi þar sem þingmenn Norðurlandaráðs hefðu tækifæri til að koma á framfæri sjónarmiðum sínum varðandi aflýsingu hringborðsumræðnanna og stöðu mála í Úkraínu.

Forsætisnefnd samþykkti tilmæli Norðurlandaráðs, samkvæmt umboði milli þingfunda, um norræna vefnaðarvöruframleiðendur í láglauNALöndum, á grundvelli nefndarálits borgara- og neytendanefndar. Þar er tilmælum beint til Norrænu ráðherranefndarinnar að vinna skriflega skýrslu um hvernig Norðurlönd geti beitt sér fyrir að norrænir vefnaðarvöruframleiðendur í láglauNALöndum stuðli að bættum mannréttindum og réttindum starfsfólks. Auk þess eru tilmæli um að halda áfram stuðningi við stofnun Nordic Ethical Trading Framework. Þá er jafnframt beint tilmælum til ríkisstjórna landanna um að þær beiti sér fyrir því að norræn vörumerki og fyrirtæki sem standa að framleiðslu í Bangladess undirriti samninginn „Accord on Fire and Building Safety in Bangladesh“ um öryggismál, og minni norræna vefnaðarvöruframleiðendur á samþykktir Alþjóðavinnumálastofnunarinnar nr. 138 og 182 um barnavinnu, nr. 29 og 105 um bann við nauðungar- og refsivinnu, nr. 100 og 111 um mismunun og nr. 87 og 98 um félagafrelsi og réttinn til að stofna félög og tryggi að samþykktirnar verði samþættar stefnu, gildismati og áætlunum fyrirtækjanna.

Borgara- og neytendanefnd, menningar- og menntamálanefnd og velferðarnefnd funduðu sameiginlega um réttindi barna þar sem Tuomas Kurttila, umboðsmaður barna í Finnlandi var gestur fundarins, en 20. nóvember nk. eru 25 ár liðin frá undirritun barnasáttmála Sameinuðu þjóðanna. Fjallað var um tillögu um eflingu samstarfsáætlunar Norrænu ráðherranefndarinnar um málefni barna og ungmenna þar sem meðal annars er lagt til að velja ráðherra í Norrænu ráðherranefndinni sem sendiherra barna og ungmenna til að fylgja eftir samstarfsáætluninni og tryggja að sérfræðipækking á málefnum barna og ungmenna sé fyrir hendi á öllum stigum norræns samstarfs.

Frekari upplýsingar má nálgast hjá ritara Íslandsdeildar og á vefsvæðinu www.norden.org.